

# QAZAQ

РЕСПУБЛИКАЛЫҚ ҚОҒАМДЫҚ-САЯСИ ГАЗЕТ / № 40-41 (1144), 04-11.10.2022

qazaq1913.com +7 (701) 505 48 48 +7 (777) 797 77 88 kazakh\_2006@mail.ru

qazaq gazeti qazaq gazeti qazaq1913\_ qazaq gazeti

1913–1918 жылдары Әлихан Бөкейхан, Ахмет Байтұрсынұлы, Міржақып Дулатұлы ыждағатымен газеттің Орынборда 265 саны шығып, большевизм теперішімен жабылды. 2006 жылы 22 наурызда Қоғабай Сәрсекеев Алматыда 266-санынан қайта жаңғыртты

## ЖАҢА БҰЙРЫҚ: БАЛАБАҚШАЛАРҒА ҚОЙЫЛАТЫН ТАЛАПТАР КҮШЕЙТІЛДІ



03

## ЭМОМАЛИ, ОЗОДА, РУСТАМ РАХМОНДАР: ТӘЖІКСТАННЫҢ КЕЛЕСІ ПРЕЗИДЕНТІ КІМ БОЛМАҚ?



05



ҮКІМЕТ ПЕН ӨКІМДІККЕ  
ОБЫС МЕКТЕПТЕРІНДЕГІ  
ОРЫН ТАПШЫЛЫҒЫ  
МӘСЕЛЕСІН БІРЖОЛА  
ШЕШУДІ ТАПСЫРАМЫН.  
БІЗ ҰСТАЗДЫ ҚҰРМЕТ ТҮТҚАН  
ЕЛМІЗ. БҰЛ СӨЗІМІЗ  
НАҚТЫ ІСПЕН БЕКІТІЛІП ЖАТЫР.  
АРНАЙЫ ОҚУ-АҒАРТУ  
МИНИСТРЛІГІ ҚҰРЫЛДЫ.  
БІЗ БҰҒАН ДЕЙІН «ПЕДАГОГ-  
ТАРДЫҢ МӘРТЕБЕСІ ТУРАЛЫ»  
ЗАҢ ҚАБЫЛДАП, ОНЫҢ  
АЯСЫНДА МҰҒАЛІМДЕРДІҢ  
ЖАЛАҚЫСЫН ӨСІРДІК.  
«ӘЛІППЕНІ» ҚАЙТАРДЫҚ...

## «ТОРҒАЙ – ҰЛТ НАМЫСЫНЫҢ ЖАЛАУЫ»

СЕНАТ ТӨРАҒАСЫ ҰЛТ ҰСТАЗЫНЫҢ  
150 ЖЫЛДЫҒЫНА АРНАЛҒАН  
КОНФЕРЕНЦИЯДА ОСЫЛАЙ ДЕДІ



ФОТО: EKK.KZ

Қостанай облысының Торғай ауылында Алаш арыстары Ахмет Байтұрсынұлы мен Міржақып Дулатұлына арналған ескерткіш ашылды...

Қостанай облысында тұтанған алапат өрттің салдарынан қыркүйек айының басына жоспарланған Ахмет Байтұрсынұлының 150 жылдығына арналған Торғайдағы іс-шаралар кейінге шегерілген болатын. «Ештен кеш жақсы» деген. Сенбіде Алаш арысының ЮНЕСКО көлемінде тойланып жатқан биылғы мерейтойы туған өлкесінде жалғасты. Сол күні Торғай ауылында Алаш арыстары Ахмет Байтұрсынұлы мен Міржақып Дулатұлына арналған ескерткіш ашылып, қос арыстың әдеби музей-үйі көпшілікке таныстырылды. Мемлекет басшысының тапсырмасымен арнайы барған ҚР Парламенті Сенатының Төрағасы Мәулен Әшімбаев осы іс-шараларға қатысты. Сөйтіп, Ұлт ұстазының «Асықпаңдар, артымызда қазы бар!» деген сөзі тағы да ақиқатқа айналды.

### Жанар ДӘУЛЕТҚЫЗЫ

#### ■ СЕНАТ ТӨРАҒАСЫ ПРЕЗИДЕНТТІҢ ЫСТЫҚ СӨЛЕМІН ЖЕТКІЗДІ

Ахмет Байтұрсынұлының 150 жылдығына арналған «Ұлтына ғұмырын арнаған Ұлы тұлға» атты ғылыми-практикалық конференцияда сөйлеген сөзінде Сенат Төрағасы Мәулен Әшімбаев мерейтойдың ұлт үшін киелі Торғай жерінде аталып өтуінің маңызына назар аударды. «Торғай – Алаш алыптарының қастерлі мекені және ұлт намысының жалауы. Торғай – салтына берік, қазақтылыққа бекем қазыналы жұрттың ордасы. Сондықтан, бірінші кезекте, Сіздермен кездесіп отырғаныма шын жүректен қуаныштымын. Бәріміздің басымыздың осы киелі қоныста қосылуына себепші болған – Ұлт ұстазы Ахмет Байтұрсынұлының 150 жылдық мерейтойы», – деп сөзін бастады Сенат Төрағасы Мәулен Сағатханұлы.

02-бетте

## СЕМЕЙГЕ САПАР

ҚАЗАҚСТАН ПРЕЗИДЕНТІНІҢ АБАЙ ОБЛЫСЫНА  
ЖҰМЫС САПАРЫ ҚАЛАЙ ӨТТІ?



ФОТО: AKORDIA.KZ

Мемлекет басшысы Қасым-Жомарт Тоқаев Абай облысына жұмыс сапары барысында жазушы Мұхтар Әуезов пен ғалым Қайым Мұхамедхановқа арналған «Устаз бен шәкірт» ескерткішін ашты...

Осыдан 105 жыл бұрын жергілікті тұрғындар Семей қаласының бұрынғы «Заречная слободкасын» «Алаш қаласы» деп атау туралы ортақ шешімге келді. Ал, 1917 жылдың желтоқсан айында Орынборда өткен ІІ жалпықазақ құрылтайында Алашорда автономиясының астанасы ретінде Алаш қаласы белгіленіп, автономияның басшылығы осы қалаға 1918 жылдың наурыз айында көшіп келіп орналасты. Іс жүзінде 1918 жылдан 1920 жылға дейін Алашорданың ресми астанасы Алаш қаласы болды. Демек, Алаш арыстарының ізі қалған Семей қаласының әр қазақ үшін орны бөлек. Өкінішке қарай, 1997 жылы Семей облысы Шығыс Қазақстан облысына қосылып, Семей қаласы «облыс орталығы» мәртебесінен айырылды. Осы фактор да қарт Семейді тоқырауға ұшыратты. Көктемде Президент Жарлығымен Абай облысы құрылып, оның орталығы – Семей қаласы болды. Сөйтіп, тарихи әділдік салтанат құрды.

### Жанар ДӘУЛЕТҚЫЗЫ

#### ■ АЛАШ АРЫСТАРЫНЫҢ ІЗІ ҚАЛҒАН ҚАЛА

Бес ай бұрын құрылған Абай облысына, оның орталығы – Семей қаласына жұма күні Қазақстан Президенті Қасым-Жомарт Тоқаев жұмыс сапарымен барды. Семей сапарында Мемлекет басшысы алдымен Абай облысының тұрғындарымен кездесті. Жергілікті жұртпен кездесуінде Қасым-Жомарт Тоқаев Семей қаласының, Абай облысының Қазақстан тарихындағы орны ерекше екенін, Алаш арыстарының ізі қалғанын да атап өтті.

«Бұл – қазақ Абай, Шәкәрім, Мұхтар Әуезов сияқты біртуар перзенттерді сыйлаған ұлылар мекені. Абай туған топыраққа келген адам бұл жердің киесін сезінеді, қасиетін ұғады. Семей – ұлы даланың ұлағатты өлкесі. Бұл – Алаш арыстарының ізі қалған, зиялыларымыз елдің болашағы үшін күрескен қастерлі өңір», – деді Мемлекет басшысы.

02-бетте

## «ТӘБЕТІ» ЗОР, БЕРЕРІ АЗ ВЕЛОЖОБА

ӘЛЕМДІК РЕЙТИНГТЕ АЛҒАШҚЫ  
ЖИЙРМАЛЫҚҚА ЕНБЕЙТІН КОМАНДАНЫ БЮДЖЕТ  
ЕСЕБІНЕН ҚАРЖЫЛАНДЫРУ ДҰРЫС ПА?

Осыдан 10 жыл бұрын сол тұстағы Қазақстан Президенті Нұрсұлтан Назарбаевтың бастамасымен, «Самұрық-Қазына» ұлттық әл-ауқат қорының қаржылай қолдауымен «Astana» кәсіби спорт клубының негізі қаланды. Осы клубтың құрамына әу баста еліміздің атын әлемге әйгілеу мақсатында 2007 жылы құрылған «Astana Pro Team» (қазіргі атауы – «Astana Qazaqstan Team») велокомандасы өтті. Өкінішке қарай, допинг дауы мен жемқорлық кәсіби спорт клубын да, велокоманданы да айналып өтпеді. Соңғы дау клуб пен команда басшылығының істі болуымен тынды. Ал, «атың шықпаса, жер өрте» дейтіндер бұл даудан артықшылық та іздейтін болар. Алайда, Абай айтпақшы, жер өртеп шығарған атыңның несі мұрат?!

### Жасулан МӘУЛЕНҰЛЫ

#### ■ ЖЕМҚОРЛАР ЖЕГЕН МИЛЛИОНДАР

Басынан бастайық. Бұл тақырып сөз болғанда әдебиетіміздің алыбы болған Бейімбет Майлиннің «Даудың басы – Дайрабайдың көк сиыры» деген әңгімесі еске түседі. Ал, атауы өзгерген велокомандадағы дау допингтен басталып, қаражатты жымқырумен жалғасты. 2020 жылдың соңында ҚР Сыбайлас жемқорлыққа қарсы іс-қимыл агенттігі «Astana» кәсіби спорт клубының директоры Аманбек Күлшіков пен «Astana Pro Team» велокомандасының атқарушы директоры Ләззат Шәмшиеваға қатысты қылмыстық істі аяқтап, оны сотқа жіберген болатын.

03-бетте













